



DEO OPTIMO MAX.

UNI ET TRINO.

VIRGINI DEIPARÆ, ET S. LUCÆ

Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS

*manè discutienda, in Scholis Medicorum, die Martis, Auctori M. Martinong.*  
*decimo-septimo Februarii Anni M. DCC. XXXIII.*

M. URBANO LEAULTE,

Doctore Medico, Præside.

*An Eunuchus, ut corpore, sic & mente minor?*

I.



ONSTAT Homo ex animâ & corpore. Hæ substantiæ quamvis naturâ discrepent, sic inter se uniuntur sibi que famulantur invicem, ut ex unius alteriusve morbo vel sanitate, alterutrius morbus sanitasve consequantur. A Præpotente Deo in eum sunt institutæ finem, ut alterius altera opem deposcat. Quid mirum, quòd hujus in illam & vicissim,

transferantur *πάλιν*? Quoties mœrore languet animus, quoties exultat lætitiâ: toties corpus aut affligitur humi, aut in cœlum sine pennis quodammodò evolat. Ubi cerebri fibrillæ medullares quâvis ratione læduntur, aut à nativo tono recedunt, statim vis animæ torpet, & ejus obscuratur intellectus. Hinc in morbis plerisque vel ex parte, vel omnino coercetur cogitatio. Cur autem in corpus anima, cur corpus in animam agat; quo inter se vinculo consociantur; unde tam stupenda necnon reciproca substantiæ duplicis & indolis diversæ sympathia? In Democriti, ut aiunt, puteo adhuc latet. Hujus generis est commercium illud, ut annumerandum sit inter Naturæ mysteria, quæ mortalibus abscondita voluit esse supremus rerum Conditor. Quis hominum, vel cœtûs maris reciproci, vel gravitatis corporum, vel generationis aut etiam creationis ipsius rationem ultimam meditando affecutus est? Unquamne poterit enodari, utrum ideo Musculus intumescat, quia repletur sanguine? An ideo sanguine repleatur quia protuberat & intumescit? Arcanas mechanismi corpori, *secretionum*, motuumve artes quis dicendo penitus evolvat, aut interpretabitur? Satiùs homini, ac Medico præsertim, plurima mirari, quàm explicare velle Naturæ phœnomena, quorum nosse causas uni competit Creatori. Quânam igitur arte corpus & anima in se invicem agant, percipere utiliùs, quàm definire; sentire, quàm explicare faciliùs. An non, pro ætate inæquali, regione diversâ, *Idiosyncrasiâ* dissimili, variis demùm corporis & animi affectibus, diversimodè ratiocinatur homo, valet, ægrotat? Mireris ergò! At ne dubites vim animæ, adeòque mentis & ingenii aciem, à perfectâ corporis partium, nobilium præsertim dispositione, earumque multiplicatâ conspiratione esse repetendam.

**I**NGENIUM, seu mentis fœtus, dum humano corpori mens alligatur, totum, ut ita dicam, à sensibus pendet. Sensus, quos & *sensationes* licet appellare, vel sunt interiores, vel exteriores. Interiores, quorum organum in nobis latet, ad animam potissimum, sensorium commune, cerebrum & ejus appendices pertinent. Exteriores, licet in nobis, nihilo tamen minùs superficiem corporis, ac præsertim capitis peripheriam spectant. Hi semper ab objectis externis primùm afficiuntur, dùm, & objecta, liberè genuina ad sensûs cujusque organa deferuntur, & organa ipsa, suscipiendis determinatis quibusdam objectorum externorum *impressionibus* idonea sunt atque disposita. Hos inter numerantur visus, auditus, olfactus, gustus, tactus. Illi, quantumvis licet spiritali principio ac proindè animæ rationali primò debeantur, nunquam tamen, dum homo respirat, nisi dependenter ab ejus cum corpore commercio eliciuntur. Hinc, in distinctis, vel etiam in iisdem hominibus adèd dissimilis voluntas, intellectus, memoria, phantasia; multiplex adèd ingenium, *sensus communis* adèd diversus. Non ab alio, dispar Veneris desiderium, sitis, fames, dolor, amor, odium, & aliæ sentientis appetitûs inæqualitates. Hinc etiam intelligere est, cur ab aëre, cibo, potu, motu, quiete, somno, vigiliâ, medicamentis, venenis, calore, frigore, consuetudine, aliisque tam variæ suscitentur cogitationes, adèd diversæ oriuntur ideæ. Quòd si ab objectis etiam exterioribus perceptio quandoque potest sollicitari vel hebetari: Quid mali non est nasciturum, ubi partium Corporis nobilissimarum hæc vel altera deficiet?

Hujus rei veritatem , *testiculatorum* probat inopia. *Testes* speciei solum perennandæ consecratos ne putaveris. Hi, quemadmodum *soboli* procreandæ , sic *individuo* perficiendo , inserviunt. A *testibus* , ubi jam pubescere mares incipiunt , & *semen* emittere , totius *microcosmi* fortitudo , vocis gravitas , cerebri robur , *sensationum* omnium vigor. A *testibus* perfecta nobilium Corporis partium dispositio , multiplicata earundem conspiratio. Hinc vir , non *semi-vir* ; hinc mentis acies atque ingenium.

### III.

**A**T in *Eunuchis* partes aliquot , & speciei propagandæ & maris conservationi necessarias deficere , quis non deprehendit ? *Eunuchi* nomine dicendus , qui *testibus* caret. *Eunuchum* natura , vel ars facit : natura , dum *testes* negat ; ars , dum aufert. Nobilissimas inter partes corporis , primum merentur locum *testes* , *cerebrum*ve. Illi tantò cæteris , excepto *cerebro* , præstantiores , quantò *species* *individuo* nobilior. Corpora sunt vasculosa , quæ ad *penis* radicem inferiùs ex *abdomine* ferè semper prominent. Horum ope *semen* à communi *sanguinis* alveo secernitur , vel in ipsum *sanguinem* reversurum , vel , dum opus est , foràs expellendum. Numerus *testium* in homine , binarius est : unicus , rarò ; tres rariùs reperiuntur. Figurâ & magnitudine suâ benè constituti *testes* *orum* æmulantur *columbinum* , cujus extremitates duæ , duo latera , duæ totidem margines distinguntur. Duplici *membranarum* involvuntur genere : tribus utrique communibus ; tribus unicuique propriis. Communes , uno *scroti* , quod produunt , vocabulo definiuntur. Peculiarium extrema , rubra vel *erythroïdes* audit ; *Elythroïdes* aut *vagina-*

lis, media; intima demum, *albuginea* nuncupatur. *Testium* substantia nihil aliud est, quam mirabilis vasorum omnis generis contextus, exilissimis præsertim, & *cylindricis* constans tubulis, qui *glomerum* instar & *intestinarum* more, circumvoluti, si evolverentur absque disruptione, immensam longitudine suâ extensionem adæquarent. *Arteriis* itaque, *venis*, *nervis*, *Lymphaticis* & ejusmodi *tubulis*, quos vocant *excretorios*, vasculosa *testiculorum* luxuriat fabrica; quibus in describendis, diutius hîc inhærere superfluum. Vasorum tam multiplicium, multiplicatorumque inter se, quid indicat apparatus? semen elaboratum in testibus, ad seminales vesiculas idcirco transfertur, ut elaboratum ulterius, ulteriusque præparatum, vel mediante pene, propagandæ prolis ergò, foràs ejiciatur, vel per *venas* & *Lymphatica* vasa refluat in *sanguinem*. Hinc & universis *microcosmi* partibus robur, & *nerveis cerebri* staminibus firmitudo, ac proinde ingenio, mentis soboli, acies, judiciumque accersuntur. *Seminis* porro in *sanguinem* refluui negatâ in *Eunucho* facultate, cæteras corporis humani partes, *cerebrum* præcipuè, liquoris maximè necessarii defectu, laborare, notum est omnibus, atque manifestum.

## IV.

**C**EREBRUM, animæ sedes; *Cerebri* cum *testibus* commercium declarant morbus & sanitas. Doleat quispiam? Semen in *testiculis*, aut nullo modo, aut lentius, tardiusque conficitur. Lætetur? Hoc idem in *testiculis*, & conficitur citius, & accuratius cuditur. Id per nebulam cum vidissent veteres medicarum rerum periti, collegerunt ex hac *sympbatiâ* partis utriusque communio-



*nem.* Neotericorum , à sectis cadaveribus nata cognitio , omnibus hodiè ferè numeris absoluta , quâ fieret arte , *testium* cum *cerebro* , cæterisque partibus *communicatio* ; demonstravit. Sic inter se connectuntur *nervi nervorumque* appendices , ut quidquid boni vel mali ab unâ eorumdem expansione proficiat , illud omne in vicinas primum , deinde in ultiores , remotissimasque propagines redundet. A *nervis* vasorum *sanguiferorum* robur ; ab iisdem *musculorum* virtus. Quò subtilior succus *nervæus* & mobilior , eò fortior vasorum *sanguiferorum* elater ; eò robustior *musculorum* vis atque *contractio*. *Nervi* perfe quâquâ versis vehunt , unde , tum vasa *sanguifera* , tum *musculorum* fibræ , suis quæque muniis ritè defungantur. At cum elaboratum in *testibus semen* , præcipuam functionum in maribus obeundarum causam suppeditet , quis subtilissimam hanc functionum omnium scaturiginem , cum cæteris corporis humani partibus inserviat , *cerebrò* præcipuè prodesse negaverit ? *Cerebrum testiculosque* ; Malpighius , Willisius , Littrius noster & Winslovius , eâ sunt perscrutati curâ , ut ex rimatâ utriusque partis structurâ , eodem ferè modo pars utraque fabricata deprehenderentur. *Nervi* utrique parti communes. Hinc utriusque commercium. Hanc partium inter se *conspirationem semini* quis prætereà non adscribat ? *Semen* est *lymphæ* portio maximè tenuis & mobilis , viscosis tamen crassisque *moleculis* , præsertim dum excernitur involutâ. Hæc in *sanguinem* reflua , non tuendæ corporis valetudini minus , quam corroborando , acuendoque marium ingenio conferre nunquam non est observata. Non aliunde , in Mœchis & nepotibus cum *seminis* in corpus universum refluxus fiat minor , virium in iisdem contingit prostratio , *pulmonum* debilitas , *lumbago* , aliaque producuntur *sym-*

*promata*. Hinc in frigidis & *castratis* extinguuntur concupiscentiæ ignes, vox immutata, fit imbellis, & degener, *ingenium* cum barba, cum *ingenio* barba deficiunt. Hæc autem *speciei* masculæ vitia, *testium* aut *seminis* defectui quis non assignaverit?

## V.

**E**UNUCHOS quamobrem aversentur Mulieres quæris? hoc non *veneri*, sed *semivirorum* naturæ, genio, minorique mentis aciei tribuendum. Norunt fœminæ, rerum multarum magistræ, quid quisque sapere debeat, quid non. Est illud inter fœminas pervulgatum, imberbes, *disertos* esse; locutuleios obesosque homines, aut *castratos* esse, aut *castratis* affines. Infelices *Eunuchi* qui, parte corporis unâ deperditâ, non in mulierum duntaxat incurrunt odium, sed & præstantissimis animi corporisque privantur dotibus, & nobilioribus imperii, vel reipublicæ muneribus, honoribusque spoliantur. Numquid enim in *spadonibus* à refluo semine mutuatur cerebrum, undè benè se habeat? An non laxiores tunc & molliores *cerebri nervorumque fibrille*, objectorum externorum imaginem, tum admittunt leviùs, tum ad animæ sedem debiliùs lentiùsque transmittunt? Quibus execti sunt, resecati vel avulsi *testes*, ii ad cogitandum tardi deprehenduntur, molles ad laborem, in iram proclives, in omne *periculosum* genus propensissimi. Dicas animi morbis præ fœminis esse opportunos. In his deest benignus ille liquor subtilis, & mobilis, quò invalida *nervorum stamina* irrorari deberent, excitari, recreari. Quæ ab huiusmodi naturæ fibris deferuntur ad animam *impressiones*, conditionis suæ sapiunt imbecillitatem. Hinc quàm facilè in *castratorum* cerebro recipiuntur admittunturque objecto-

rum *imagines*, tam facilè etiam delentur & obliterantur. Hinc animus eorum, oblati, receptisque rerum & *imaginum impressionibus*, non hæret tandiù, quandiù opus est, ut de singulis rectè possit judicare. *Seminis* itaque defectu mentem eorum hebescere fatearis. *Ægyptiis* mos fuit, ad Regem usque Ptolomæum Cleopatrarum fratrem, *Eunuchos* ab administratione imperii penitus arcere. Imperatores Romani, præcipuè Constantinopoli, cum regni capefferent habenas, Imperatorum, quorum in locum succedebant, superstites *castrari* filios idcirco curabant, nè tandem aliquandò ad regendum Imperii clavum accederent. Quid autem hæc, inquires? Summi didicerant Imperatores, longo rerum usu edocti, *Eunuchis*, & *spadonibus*, eam deesse vim *corporis*, & *ingenii* aciem, quam gerendis, gubernandisque Imperii rebus, habilem experti fuerant. Vis plura? in eâ, quam profiteamur, Christianissimâ religione, nonne, ob *testium*, & mentis inopiam, à sanctioribus Ecclesiæ mysteriis, ipsisque Sacerdotii honoribus arcentur *spadones*, dejiciuntur *Eunuchi*?

Ergò Eunuchus, ut corpore, sic & mente minor.

## DOMINI DOCTORES DISPUTATURI.

M. Otto - Casimirus Barsknecht.

M. Joannes - Baptista - Ludovicus Chomel.

M. Joannes-Baptista Chomel  
Medicus Regis ordinarius  
& à Regiâ Scientiarum  
Academiâ.

M. Robertus - Hubertus  
Linget.

M. Nicolaus le Tellier.

M. Philippus Cayon, Antiquus Facultatis Decanus.

M. Achilles - François Fontaine.

M. Petrus Afforty.

M. Alexander - Petrus  
Mator.

Proponebat Parisiis CLAUDIUS-CAROLUS DEJEAN,  
Parisiensis, Baccalaureus Medicus, A. R. S. H. 1733.  
à sextâ ad meridiem.